

æek
22. korrika

3. ALBISTEA

2022/01/19



C1

MAILA

**Amurriotik Donostiara,
ibilbide osoa aurkeztu dute.**

HITZETIKIN

Amurriotik Donostiara

2022ko martxoaren 31tik apirilaren 10era

Amurriotik Donostiara, ibilbide osoa aurkeztu dute.



Amurriok emango dio hasiera 22. Korrikari. Amurrio Arabako ipar-mendebaldean dago, Aiaraldea eskualdean. Araban populazio handiena duten herrien artean hirugarrena da (Gasteizen eta Laudioaren ondoren). Gasteiztik 40 bat kilometrora dago, eta Bilbotik 30 bat km-ra. Martxoaren 31n hasita, hamaika egunez, etenik gabe, eguzkipean zein ilargipean, Euskal Herri osoa zeharkatuko du KORRIKAK: Nerbioi ibaiaren haranetik, Durango aldera; Anbotoko Damaren babesetik, Gasteiza; eta handik, Arabako Lautadara; patataren erreinutik, Euskal Herriko hiriburu historikora; Iruñetik, gure herriko basamortura; Erregeren Berdeatik, gure herriko birikara; Pirinioetatik, mendi, arroila¹ eta historiaz betetako lurraldera, Donibane Garazira eta Maulera. Eta, Mauletik, berriro ere Nafarroara; Baigorritik abiatuta, Euskal Herriko barnealdea igaroko du: mendi, larre zein lautada, Arabako mahastietaraino; eta, ardoaren lurraldetik pasatu ondoren, metropolira iritsiko da, "Bilbo Handi"ra.

Itsasoari begira pasatuko da KORRIKA Bizkaitik Gipuzkoara, eta, handik, hondartza eta itsaslabarrei² agur esanda, barnealdera joango da berriro, Baztan aldera. *Sorgin* esan zieten emakume ausarten lurraldean, Sarako eta Zugarramurdiko leize ikusgarriak atzean utzita, Baionara iritsiko da, Kantauri itsasoari ku-ku egiteko. Eta, horrela, ttipi-ttapa, ttipi-ttapa, helmugaraino, Donostiaraino, Txillardegiren sorlekuraino³. Apirilaren 10ean, milaka euskaltzalek Donostiako kaleak hartuko ditugu, hitzez ekiteko prest!

KORRIKAREN APPA

Aurten ere, KORRIKARI egunez egun jarraitu ahal izateko aplikazioa guztien eskura jarriko du AEK-k. Aplikazio horren bidez, hainbat informazio eskuratu ahal izango da: ibilbide osoaren mapa, lasterketa une oro non dagoen, edozein lekutara noiz helduko den... Ibilbideari buruzko informazioaz gain, KORRIKARI buruzko azken orduko jakinarazpenak ere jaso ahal izango dira.

PETOAK SALGAI

KORRIKA dotore egiteko, dagoeneko salgai daude petoak: hiriburuetako dendetan, *online*, eta, hemendik aurrera, baita euskaltegietan ere.

Hiztegitxoak:

1. arroil: foz, cañón; *canyon, gorge*
2. itsaslabar: acantilado; *falaise*
3. sorleku: lugar de nacimiento; *lieu de naissance*

NONDIK NORA JOANGO DA? ZEIN ORDUTAN PASATUKO DA?

Martxoak 31

Amurrio 16:30
Balmaseda 19:23
Ugao 23:51

Apirilak 3

Cárcar 01:39
Tutera 11:43
Zangoza 22:59

Apirilak 6

Kanpezu 00:37
Igorre 15:12
Bilbo 19:37

Apirilak 9

Doneztebe 03:42
Kanbo 12:52
Baiona 17:29

Apirilak 1

Durango 05:11
Legutio 14:59
Gasteiz 17:07

Apirilak 4

Irunberri 00:37
Donibane Garazi 14:58
Maule-Lexarre 21:26

Apirilak 7

Barakaldo 00:00
Bermeo 13:33
Ondarroa 22:39

Apirilak 10

Irun 00:54
Hernani 06:49
Donostia 07:36

Apirilak 2


Agurain 00:05
Iruñea 09:18
Tafalla 20:57

Apirilak 5

Baigorri 03:50
Lekunberri 13:32
Lizarrar 20:53

Apirilak 8

Zumaia 03:08
Andoain 08:48
Beasain 19:39



1. Kokatu leku hauek mapan:



1. Abadia jauregia



2. Xabierko gaztelua



3. Gaztelu Zaharra



4. Gaztelugatxe



5. Ulibarri-Ganboako urtegia




6. Itzurun hondartza



7. Erregeren Bardea



8. Arnagako lorategiak



9. Sorginetxe trikuharria

2. Berridatzi esaldiak, ondoko hitz edo egiturak erabiliz:



1. Amurriok emango dio hasiera 22. KORRIKARI.

Amurrion

2. Eguzkipean zein ilargipean, Euskal Herri osoa zeharkatuko du KORRIKAK.

Bai, bai

3. Azken uneko albistea jakinaraziko dituen aplikazioa da KORRIKArena.

..... ditu.

4. Ibilbideari buruzko informazioaz gain, une oro non dagoen ere jakin ahal izango dugu.

..... ez ezik,

5. Orain herritar guztiek jakingo dute KORRIKA nondik nora ibiliko den.

Orain ez da egongo

6. Dagoeneko salgai daude petoak: *online*, eta baita euskaltegietan ere.

..... ere bai.

PROZEDURA:

- ▶ Albistea hedabideetan ikusi ote duten galdetu, eta gaia aurkeztuko dugu.
- ▶ Ikasleek albistea irakurri eta ulermenari dagozkion zalantzak argituko ditugu (2. or.).
- ▶ **Albistea komentatuko dugu** (aplikazioa¹ gure telefonoetan deskargatu, eta ikasleekin ikus dezakegu, eta, ikusi ahala, egoki deritzegun azalpenak eman).
- ▶ Euskal Herriaz zer dakiten galdetuko dugu: zenbat herrialde ditu? Zein dira hiriburuak? Ez badakite, azalpenak emango ditugu pantaila handian egoki deritzogun mapa² jarrita (ikasleei 3. orrialdea banatuko diegu).
- ▶ **1. jarduera azalduko dugu** (3.- 4. or.): binaka, irudietako lekuak mapan kokatu beharko dituzte.
- ▶ Talde handian zuzenduko dugu, eta irudietako lekuak ezagutzen ote dituzten galdetuko dugu (nahi izanez gero, euskarazko Wikipediak dakarrena ere pantaila handian paratu, eta gure hitzetan azal diezaiekegu leku horiei buruz zer jartzen duen; Bide batez, ikus dezatela euskarazko Wikipedia ere badagoela...): noiz egon ziren toki horietan, norekin, ezagutzea merezi ote duten...

ERANTZUN ZUZENAK:

1-i; 2-d; 3-e; 4-f; 5-a; 6-g; 7-c; 8-h; 9-b

1. Abadia jauregia (Hendaia)
2. Xabierko gaztelua (Zangozako merindadean)
3. Gaztelu Zaharra (Maule-Lexarre)
4. Gaztelugatxe (Bakiotik Bermeorako bidean)
5. Ulibarri-Ganboako urtegia (Legutio ondoan)
6. Itzurun hondartza (Zumaia)
7. Erregeren Bardea (Tuteratik Cadreitarako bidean)
8. Arnagako lorategiak (Kanbo)
9. Sorginetxe trikuharria (Agurain)

- ▶ **2. jarduera azalduko dugu** (4. or.): esaldiak berridatzi beharko dituzte.
- ▶ Talde handian zuzenduko dugu.

ERANTZUN ZUZENAK:

1. **Amurrion** hasiko da 22. KORRIKA.
2. **Bai** eguzkipean, **bai** ilargipean, Euskal Herri osoa zeharkatuko du KORRIKAK.
3. KORRIKAREN aplikazioak azken uneko albisteak jakinaraziko **ditu**.
4. Ibilbideari buruzko informazioa **ez ezik**, une oro non dagoen ere jakin ahal izango dugu.
5. **Orain ez da egongo** KORRIKA nondik nora ibiliko den jakingo ez duen herritarrik.
6. Dagoeneko salgai daude petoak: *online*, eta euskaltegietan **ere bai**.

- ▶ Amaitzeko, KORRIKAREN ibilbideari erreparatu, eta **gaiari buruz arituko gara³ ikasleak parte hartzera animatuz**: noiz pasatuko da KORRIKA gure herritik edo gure herritik hurbil? Nondik iritsiko da? Zein ordutan? Norantz joango da? Nora joango gara KORRIKA egitera? Norekin? Euskaltegiko lagunekin animatuko ote lirartekeen galdetu...

¹ Aplikazioa deskargatzeko: iPhone: <https://apps.apple.com/es/app/korrika/id594215660>
Android: <https://play.google.com/store/apps/details?id=eu.aking.korrika>

² Ikusi *EH eta ibilbidearen IRUDIAK.zip* karpeta.

³ Solasaldia egiten laguntzeko, ikusi pantaila handian "3 KORRIKA albistea- Titularrak"